

# S. Barbara

## S. BARBARA NIA ISTÓRIA

S. Barbara moris iha Nicomedia iha 273; ema bolu nia “barbara” katak estranjeira, la’ós ema Roma nian, tanba nia gosta estuda no ladún partisipa ba festa sira. Entre 286 no 287 nia aman, Dioscoro ba hela besik Roma hodi kolabora ho Emperadór. Bainhira Barbara sai sarani, Dioscoro sai hirus no Barbara tenke halai iha ai-laran; maibé ema ka’er nia hodi entrega nia ba prefetu Marciano. Durante prosesu, ne’ebé hahú iha tinan 290, nia konvida nia aman no ema ne’ebé prezente iha tribunál atu nakfilak an, tan ne’e Marciano haruka atu tortura nia. Loron 4 dezembru nia aman rasik oho nia, maibé nia mós mate tanba rai-lakan kona nia.



Filme ida ne’e foti inspirasaun husi notisia ne’ebé sarani sira hatene kona-ba s. Barbara, maibé mós aumenta akontesimentu ruma atu evidénsia liuliu aspetu rua:

- ⇒ Domin no amizade ne’ebé tulun atu fiar ka hela metin iha fiar
- ⇒ Obediénsia nu’udar karakteristika ida moris nian

Ba ita-nia reflesaun ita sei fó atensaun liuliu ba obedienísia. Filme ida ne’e hatudu virtude ida ne’e tuir aspetu tolu: obedienísia nu’udar oan, obedienísia nu’udar soldadu, obedienísia nu’udar ema fiar na’in.

### Obedienísia nu’udar oan

Bainhira filem hahú bele haree Barbara nu’udar oan ne’ebé halo tuir buat hotu ne’ebé nia aman husu, maski dala ruma susar ba nia (ez: bainhira nia aman husu fali nia inan nia brinkos), maibé neineik, Barbara aprende atu “tetu” buat ne’ebé nia aman husu, no atu avalia tuir kriteriu lialoos nian no nia komesa atu la tuir buat hotu ne’ebé nia aman manda. Tan ne’e, iha momentu ida, nia aman dehan ba Barbara: “Ó sei sai fali oan ne’ebé obedese, hanesan uluk...”.



### Obedienísia nu’udar soldadu

Loloos, iha filme ita haree la’ós de’it obedienísia nu’udar soldadu ida ba ninia estadu, maibé iha aspetu fidelidade nian ba Emperu, ba Roma, no ba sira ne’ebé reprezenta estadu. Obedienísia ida ne’e la iha “hanoin”, hanesan Marciano dehan ba Claudio: “Ó-nia dever nu’udar soldadu mak obedese ha’u”. Iha obedienísia ida ne’e, ema tenke halo tuir hodi la husu buat ida, hodi la hanoin se buat ne’ebé superior manda mak loos ka la’e: tenke halo tuir de’it!

### Obedienísia nu’udar ema fiar na’in

Sarani sira hakotu atu la oferese sakrifísiu ba Emperadór no atu la halo tuir buat ne’ebé Marciano husu, tan sira-nia fiar. Sira fiel ba buat ne’ebé sira promete no sira komprende katak atu moris nu’udar sarani tenke metin (halo tuir) iha Maromak nia hakaran, maski difikuldade ka terus. Sira hatudu buat ne’ebé S. Pedro hateten ba na’in ulun sira iha Act 4,19: *Iha Maromak futar oin, imi hanoin ba: ami halo tuir imi-nia haruka hodi la halo tuir Maromak, ne’e loos ka lae!*

### *Pergunta ruma*

Iha imi-nia moris, imi iha esperiénsia kona-ba obedienísia tolu ne’e? Ba aspetu ida-idak koko atu dehan bainhira mak imi moris tuir obedienísia nu’udar oan, nu’udar soldadu (maski imi la’ós soldadu ida) no nu’udar fiar na’in.

Obedienísia ida ne’ebé mak fasil liu atu moris tuir no bainhira mak susar liu?

Iha sentidu sarani, obedienísia mak atitude espirituál ne’ebé akompaña liberdade tasak ida, maibé iha filme, bainhira Barbara hahú atu desobedese, Marciano no Dioscuro dehan katak nia la hatene uza ninia liberdade. Husi imi-nia esperiénsia imi bele dehan katak bainhira imi la halo tuir katak imi espresa imi-nia liberdade tasak, ka dala barak ita la halo tuir tanba... ita la koho, ne’e de’it?

